

上來雖有略廣二段，總是解頌上之三句，答頌前問訖。自下釋頌下之三句。於中有二：初、別解三句，後、別解能變義。三句不同，即分爲二，此解初句也。

「所變相」者，釋頌「此」言。此見、相分相狀，各各有無量故。所言「唯」者，是決定義，此見、相分所依自體能變之識，體類定三，非增減故；或簡別義，如前已說。

◆六二二◆ 一、謂異熟，即第八識，多異熟性故。

合解下二句。謂初二識及第三識，如理應知。

「多異熟」者，謂此識體總有三位：

一、我愛執藏現行位：即唯七地以前菩薩、二乘有學、一切異生，從無始來，謂名「阿賴耶」。至無人執位，此名「執藏」。

二、善惡業果位：謂從無始乃至菩薩金剛心時，或解脫道時，乃至二乘無餘依位，謂名「毗播迦」；此云「異熟識」，

「毗」者，異也，「播迦」，熟義……至無所知障位。

三、相續執持位：謂從無始乃至如來盡未來際利樂有情位，謂名「阿陀那」，此云「執持」，或名「心」等。

長短分限，不過三位。以「異熟」名，通初、二位，故論說言「多異熟性故」。不言初，以狹故；不言後，以寬故。

寬、狹何事遮不說也？

此中意說熏習位識。若說寬時，佛無熏習，說即無用；若說狹時，八地以後，猶有熏習，便為不足。又但說因有虛妄位，不說於佛，故說異熟識是「多異熟性」，寬、狹皆得。

又為五位：一、異生位，二、二乘有學位，三、二乘無學位，四、十地菩薩位，五、如來位。「異熟」一名，通前四位，故言「多異熟性」，不說餘名。

又十三住，通十二故。又七地，如〔樞要〕說。

◆六二₃◆一一、謂思量，即第七識，恆審思量故。

謂第七識恆審思量。

此說「恆」言，簡第六識。意識雖「審思」，而非是「恆」，有間斷故；次「審思」言，復簡第八，第八雖「恆」，非「審思」故；「恆審思量」，雙簡五識，彼非恆起、非審思故。

若言此識實內思量，何故此中不言內者，通無漏說，佛此亦緣外境相故。

此「恆」等言，各有所簡，如〔樞要〕說。

◆六二₃◆三、謂了境，即前六識，了境相粗故。

下、解第三句也。以前六識同了粗境，異七、八故，合爲一名。

問：此前六識亦緣細境，如佛六識等，何故但名粗？答：一、多分故，二、易知故，三、諸有情共可悉故，四、內〔外道〕皆許有故，五、〔大、小乘〕所極成故，六、不共義故，七、八

二識不粗了故。

此後二識，亦通淨名，非所熏故，又互顯故。以上如「樞要」說。

◆六二四◆「及」言，顯六合爲一種。

謂前頌言「及了別境識」，解彼「及」字。

「及」者，合集義。以「了境識」六種不同，今合爲一，名爲「了境」，故言「及」也。「及」字雖通「相違及」等，今顯「合集」，故解「及」言。

◆六二四◆此三皆名能變者，能變有二種：

上來雖別解後三句，出能變體，然未解釋能變之義，故今應說。於中有三：初、牒列數，次、依標解，後、總料簡。初、牒「能變」列其數也。

束三能變合爲二種，即以二義解「能變」也。

◆六二五◆一、因能變：謂第八識中等流、異熟二因習氣。

次、依標解，爲二文也。

此言「因」者，即所由故，謂種子也。辦體生現，爲現行生之所由也，此名，唯望現果爲名。據理而言，應名果變，種及現行所引生故，今望果說現行因故。

「變」者，是轉變義。在三能變初異熟中，顯所依止能持之識所有等流、異熟二種習氣是也。

言「習氣」者，是現氣分，熏習所成，故名「習氣」。自性親因，名等流種。異性招感，名異熟種。一種子，二種攝盡，士用、增上於此二中，假施設立，故不說之。

謂「因」即「能變」名，「因能變」，謂此二因能變生後自類種、同類現行，及異熟果故。

◆六二六◆等流習氣由七識中，善、惡、無記熏令生長。

不以等流所變之果顯其自性，但舉等流能變之因以顯自體。義顯所生通諸有漏三性之法各自種子，所引八識各各自果。

名言種子是也。

「等」，謂相似；「流」，謂流類；即種子與果性同。相似，名「等」；果是彼類，名之爲「流」；即從等所流，從因爲名，故名「等流」。即等之流，依土釋也。即名言熏習種子，是等流之習氣，名「等流習氣」。等流非因名，故等流習氣，非持業釋。以第八識不能熏故，唯說七生。七唯無記，六通三性。

◆六二六◆異熟習氣由六識中，有漏善、惡熏令生長。

前等流因，是因緣種，其所生果，即通八識種。此異熟因、增上緣種，即是有分熏習種子。不以所生異熟之果顯其因性，但舉此「因能變」之因以彰自體，義顯所生除第七識，可通餘識及五蘊等無記之法。

此體雖通善惡二性，果唯無記。前因因果，皆通三性。第七識，唯無記，非異熟因，勢力羸劣，不感果也。此非異熟，

有覆性故，第八不能熏此中皆不說。

明「因能變」，即是種子轉變生果。果，通種子及與現行，自類種子亦相生故。【瑜伽】第五「種子七義」云：與他性爲因，亦與後自性爲因，非即此刹那。

舉「因能變」，意顯七識等諸現行法，亦名爲「因」，亦名「能變」。故二習氣，各舉能熏諸因緣體辦體生果者名「因能變」。故轉變之義，通現種也。種因變，唯在第八；現因變，通餘七識；不說我見熏習種子，離此二外，無別體故，於名言中別離出故，不能別招後果生故。

言「異熟」者，如前已說。「異熟習氣」，唯依士釋，果是「異熟」，因名「習氣」故。第八，唯果變，而非因；種子，因變而非果；現七識亦因，亦果能變；前六識中異熟無記心等，同第八識，唯果能變，非能熏故；至下當知。

問：既說現行爲因能變，種子何故非果能變？對誰名因？

答：此中果變謂有緣法，能變現義，故種子非。若體是果，而能轉變，種子亦是。今【論】但說有「八識生，現種種相」，故知但說現行果法，名果能變，由以變現名能變故，種子但以轉變名變。

「等流能變」，或是持業，或依士釋。「異熟能變」唯依士釋。三熏習等，下自當說。

◆六二七◆ 一、果能變：謂前二種習氣力故，有八識生現種種相。

即前二因所生現果，謂有緣法能變現者，名「果能變」，非因所生皆名爲果能變。不爾，種子應名「果能變」，自相生故。此果能變，即自證分，能變現生見相分果。

此言「變」者，與前不同，是有緣變，變現爲義。識中種子，果之所變，識所緣故。由前等流能變力故，八識三性因緣果生；由前異熟能變力故，除第七識，餘之七識無記果生。舉

因顯果，無記之法，體性羸劣，要等流、異熟二因所生名果能變，餘則不爾。

「種種相」者，顯相應等見、相法，五蘊非一，言「種種」也。

若種子，唯轉變，名變；若第八識，唯變現，名變；若能變七識，得二變名。此前所說，並在因位有漏之心。若在因位，無漏之心唯第六、七；種及現行，唯有等流因果能變。若佛果位，八識現行，唯有等流果能變攝，以在果位不熏習故；其諸種子，名因能變，生自類種及現行故。三界具幾，如理應思。

◆六二₈◆等流習氣爲因緣故，八識體相，差別而生。

後、總料簡前因能變等流習氣。

習氣者，種子也。必有其果，未知生何、如何生果、能起何果，即有三義。今顯所生，通於八識，能爲因緣生八識也。

「體」，謂體性，「相」，謂相狀，自證、見、相，俱名

爲識。

◆六二九◆名等流果，果似因故。

顯是何果。

釋等流義，爲因緣生。因緣之法，必同性故。

◆六二九◆異熟習氣爲增上緣，感第八識，酬引業力，恆相續故，立異熟名。

前因能變中，言異熟習氣，既是種子，未知生何、如何生。今顯增上緣生，不親生故。所生眞異熟者，唯第八識。增上緣生，性不同故，唯第八識是總果故，是果之主，餘果方生，主引生故。由強勝業引總果已，餘別弱業，方能生果。據其勝業名引，引餘業生故。報亦名引，引餘果故。業勝名引，果無間故，說「恆相續」。由恆相續，及是引果，立「異熟」名，餘法不爾。

◆六二一〇◆感前六識，酬滿業者，從異熟起，名異熟生；

不名異熟，有間斷故。

顯異熟因所生未盡。

即明亦感前之六識，俱增上緣。此是別果，故業名「滿」。「引」如作模，「滿」如填彩。以此六識，從第八識眞異熟起，名「異熟生」。以非是主，有間斷故，不名眞異熟。成圓果事，具足果事，名之爲「滿」。亦通因果，皆有滿義，業勝名「滿」。

◆六三一◆即前異熟及異熟生，名異熟果，果異因故。

釋生何果。

言異熟果及釋異熟。因是善惡，果無記故，別從總稱，二種俱名異熟果，即由知前所說故。其第七識，非異熟種之所引生，因位唯染，果無漏故。

問：六識報者，非眞異熟，名異熟生者，善等三性法應名「異熟」生？並從眞實異熟起故。

答曰：不然。【對法】第五說：若法是異熟，從異熟起者，

名「異熟生」。善等唯從彼起，不是異熟，故不名「異熟生」。
 若爾，即真異熟從自前念及種起故，應名異熟生？合具二
 義故！

答曰：可然。如〔瑜伽〕〈六十三〉〈有心地〉，廣說如
 彼。

今應義釋：若法異熟，從異熟起，無間斷、遍者，名為異
 熟，名「異熟生」。若法異熟，從異熟起，有間、不遍者，名
 「異熟生」，不名異熟。若法非異熟，有間、不遍，雖從異熟
 起，不名異熟，不名「異熟生」。若法有漏，依異熟者，可名
 異熟生，不名異熟。有漏種子，皆名異熟生。由是，無漏種子
 不名「異熟生」，體非有漏，不同性故。若法有為，依異熟有，
 不名異熟，名「異熟生」，因中無漏，並名「異熟生」。

故〈五十七〉云：二十二根一切，皆有異熟種子。由是，
 佛果諸無漏法非「異熟生」。若法緣合，與本性別，變異而熟，

果始能生，名「異熟生」；即一切有爲，皆「異熟生」，故具知根名「異熟生」。

今五義中，取第一義，唯第八識，不取於餘。

◆六三₂◆此中且說我愛執藏：持雜染種，能變果識：名爲異熟，非謂一切。

雖異熟果通七識有，今初能變，唯眞異熟，我所藏故，持染種故，名眞異熟。非說一切業所感者，皆初能變。

「持雜染種」，即顯善惡業果名識。「能變果識」者，顯此非是能變之中因能變也，不能熏故。「我愛執藏」，顯初名也。言「異熟」者，或異時而熟，或變異而熟，或異類而熟，或異熟因所招，名異熟果。

前二、無文解；第三、第四，依士釋，或持業釋，異熟即果故。然下十因得五果處，彼自料簡，故今不述，如〈第八卷〉。

此中所言「異熟生」者，一切色法，非第八品，亦異熟生。